

四庫全書

集部

欽定四庫全書

集部

閩中十子詩卷一至三

詳校官中書臣瞿熙

助教臣常循覆勘

總校官進士臣朱銓

校對官主事臣陳文樞

謄錄監生臣吳銓

欽定四庫全書

集部八

閩中十子詩

總集類

提要


臣等謹案閩中十子詩三十卷明袁表馬熒同編表字景從熒字用昭皆福州人閩中十子者一曰福清林鴻有膳部集一曰長樂陳亮有儲玉齋集一曰長樂高廷禮有木天清氣嘯臺集一曰閩縣王恭有白雲樵唱鳳臺

清嘯草澤狂歌諸集一曰閩縣唐泰詩軼不  
傳散見善鳴集中一曰閩縣鄭定有澹齋集  
一曰永福王偁有虛舟集一曰閩縣王褒有  
養靜集一曰閩縣周元有宜秋集一曰候官  
黃元其集名不傳皆明初人萬厯丙子表等  
即高以陳家所藏諸人之詩選為是集考閩  
中詩派多以十子為宗厥後輾轉流傳漸成  
窠臼其初已有唐摹晉帖之評其後遂有詩

必律有律必七言而晉安一派至為世所詬  
厲要其濫觴之始不至是也十人遺集已不  
盡傳傳者亦不盡可錄此編採擷菁華存其  
梗概猶可以見一時之風氣固宜存以備一  
格焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

閩中十子詩卷一

明 袁表

馬熒 編

林膳部集一

五言古詩

擬古七首

北辰何巍巍居為衆星宗  
玄杓在北青陽乃旋東七  
曜潛幹運四時自成功  
靜觀造化機毋乃君道同

其二

神龍潛深淵不在尺水池飛鳳將鍛羽亦擇梧桐枝玉  
以貞自珍蘭以幽見奇君子莫屈身身屈道乃卑

其三

迢迢洛陽城雉堞何逶迤上有天子宮下列公侯居外  
廡鳴騶裏中饋進鮮肥身無澣濯服路有餘梁脂巍巍  
金馬門云是上天梯仕宦有捷徑請託無虛時布衣謁  
公家言拙氣亦卑丈夫無所求守道寧食薇



其四

倦僕秣我馬駕言將驅馳戚戚感路人問我去何之答  
云商山路幽谷多紫芝樂與素心人採掇療朝饑路人  
聽斯言揮淚持我歸舉手謝之去吾駕不可違

其五

翩翩雙白鶴久在樊籠中刷毛向朝日舉翅傷秋風雖  
蒙惠養恩自比雞鶩同嘆息此珍禽默默傷余衷放之  
煙霞表飲啄詎見蹤

其六

秋月何皎皎素魄流虛堂攬衣步清影玉露生淒涼感  
之獨徘徊驚波疾流光雖無景公汨惻惻還堪傷世路  
多榛棘人心競羊腸得酒且須傾毋令空鬢霜

其七

千金買駿骨寧與駑駘同乃知陶潛翁避俗甘固窮縱  
酒愛五柳折腰若為容葛巾漉春釀庭柯響青璫怡然  
日為樂自視村野農而我頗疎散失身塵網中翹首企

高步遙遙安可從

感秋十二首

撫劒中夜起氣候何淒清  
天高白露下北斗當前楹  
嗷嗷雙飛鴻隨陽亦宵征  
微禽爾何知寒暑嬰其情  
始知玩物化中復念吾生  
三十志有立一經尚無成  
緬懷古哲人信與大運并  
道在無終始時來暫衰榮  
感嘆不能寐延首東方明

其二

中夜有遐想假寐登崑崙飄飄列仙人授以漆書文玄  
鳳振其羽三芝吐靈根文螭為我駕赤豹為我蹲覺來  
戶牖虛明月當前軒服膺念古訓抱經究微言中道誠  
可尚荒謬何足論

其三

陽精自東生陰魄復西沒兩曜無停機萬古一起忽方  
平笑麻姑綠鬢已成雪誰識青青松蟠根向溟渤

其四

秋氣悲萬物攬衣坐中庭仰視明月光俯聞候蟲鳴人  
生會有涯懽樂當及時榮期但長嘆墨子徒自悲驅馬  
被紉綺雕盤割鮮肥酒酣論意氣中心貴相知終當委  
運去得飲無復疑

其五

威鳳志八表驚鳥思遠擊志士徇苦節秉心猶鐵石黔  
穀恤齊饑餓者嗟輟食朝歌墨回車勝母曾不入悲哉  
爰旌目行矣申徒狄世無成子高疇能掩真跡

其六

季世尚遊俠使氣凌諸侯就死輕一芥含恩重山丘荆  
卿觸秦怒漸離重燕憂小節若可尚大義非良籌嗟哉  
黃金臺千古令人愁

其七

朝登北邙坂墟墓何纍纍懷哉泉下人惻然我心悲往  
者不可復來者每如斯膏火煎萬族紛紛競刀錐生存  
華屋居死與草木萎愚知同土壤英靈竟何知所賴賢

哲士千齡名不墮

其八

大塊覆羣迷疇能會其妙狂夫每如醉至人獨先覺  
草木養氣體金石駐精魂多岐但驅車孰踵玄玄門  
漢武志三島秦皇窮八垠馬知淡泊水可沃靈臺焚

其九

大化有培覆貧窮固其常奈何東鄰子索居多慨慷在  
桁無懸衣晨飧曠儲糧饑寒不自保妻子安得將投杖

出門去仰逐浮雲翔周流極四海組練歸故鄉寄語寰  
中士空乏庸何傷

其十

四時互相竭兩曜無停軸夏炎方滿盈秋氣忽已肅空  
閨有佳人十載常獨宿中心豈不貞處闇誰見燭願為  
明月珠流光照君屋

十一

空谷有隱士服食常不周藿羹笑鐘鼎裋褐輕王侯樵



漁有時間但與麋鹿遊持身豈不隘安命固無憂我願  
見其人欲往道無由迷途諒未遠反策營吾丘

十二

聖人處憂患微言在明夷世人昧獨處悔吝相與期君  
看文毛豹隱霧南山陞寄言狂馳子曷用此道推

無諸釣龍臺懷古三首

無諸昔建國赤土疏王封築臺青冥上垂釣滄江龍乘  
龍去不返千載如飛蓬只今荒臺上寂歷多遺蹤我有

太古懷來吟江上峯天青海氣滅地古寒煙濃潭水綠  
萬丈秋岑碧千重登臨未能已落日催孤鐘

其二

甌閩古夷服無諸漢英雄秦鹿既已死却辭隆準翁組  
練照海色旌旗來故宮赫矣茅土業大哉開闢功事往  
滄海變龍飛霸圖空昔日釣龍臺空餘江水中桂殿苔  
色古空陵雲氣紅朝夕卷寒潮隱隱聞雷風登臨畢餘  
景感嘆無終窮

其三

無諸東海上有國在秦先一朝逐秦鹿戈甲相勾連高  
才已得志論封亦徒然歸來築高臺投竿釣蜿蜒屠龍  
雄按劒拂拭滄洲煙英風振海岳古月經蠻天昔人不  
可見蹤跡復堪憐閒來弄秋水漁情藹清川雲高碧海  
淨日落千山妍筦歌古臺上醉向酒家眠

西狩

顓頊閉天地玄冥始司冬明堂敞八水井邑閒九農東

魯考王制西狩收歲功天仗列鉅野雲師掩象蒙鳴鐘  
天地震烈焰川原紅置張六合窄囊括九有空熊羆既  
股栗豺虎無留蹤夫何玄朽精亦困鉏商弓五趾運坤  
軸孤觸鳴蒼穹舉武中矩度流音若黃鍾虞人一驚告  
尼父心已恫瑞物際顏運嗟哉吾道窮遺經告文成筆  
削垂至公飛霜礪斧鉞白日開鴻濛感嘆終絕筆千古  
來悲風

塞下曲

交河水是路天山雪作花舉頭猶漢月沒足已黃沙遠  
戍連烽火嚴更起清笳將軍帳中卧萬馬夜不譁國恥  
猶未雪壯士莫思家

其二

宛馬金作勒壯士鐵為衣橫行出塞門日落黃埃飛  
匈奴倉卒至士卒被重圍戰餘平野中惟見空鞍歸  
家中白頭母猶自倚寒扉

為陳少府賦望雲

高臺臨廣遠上抗浮雲端遊子思親闈登之以遐觀親  
闈不可見白雲阻河關顧茲好爵縻何當一承顏登山  
山有岐涉水河有湍王事雖賢勞敢辭陟岵難青天何  
茫茫大地亦盤盤歸袖欲奮飛願附鴻鵠翰

寄衣曲

漢月絳庭樹嚴霜拂城樓邊人一夜寒深閨始知秋起  
來理征衣纖手一何柔雙杵幾不勝寸心未能休梧葉  
下浙浙草蛩閒幽幽月明嗟慰意風急復含愁白露下

蘭心蘭心亦枯槁  
妾家有高臺下有漁陽道  
明發寄征人  
三挹薜蘿草

謁昌黎先生祠兼呈王潮州

窮冬到南海驅馬韓山灣  
繁霜野水落鱣溪清且寒  
伊昔潛脩鱗白日飛風湍壯哉昌黎翁  
洪流靜而安伊予謁遺廟兼以窮遐觀  
地古白雲滅潮來滄海寬夫子繼芳躅  
而能障波瀾丈夫遇知己遲暮彈吾冠

春日首陽懷古

東風蕩霏靄旭日生巖巒清飈洒襟佩聊以窮躋攀遊  
日俯高墳歎然復悲酸清標香名立幽壤芳骨寒孤騫  
仰鸞鳳鳥雀易所餐濁流激清波洒然天地間古木翳  
芳祠野蕨迷空山遲回竟將夕振策未能還

驅車篇送張志道奉親柩歸清漳

驅車出東門我車已載脂況茲苦寒月歌此陟岵悲夙  
駕指晨星日人不遑棲道路豈不遙筋力亦云疲飛鳥  
為我吟孤禽為我啼浮雲結為旆迴風亦淒其引領望



故山丘壘何累累感彼首丘志懷哉蓼莪詩

羅浮觀日圖

昔有學道者擔簦海上行宴坐羅浮峯內視觀無形晞  
景正東豁滉漾扶桑明雲濤既洶湧龍獸亦悲鳴吾聞  
混沌分坤軸東南傾百川走空虛日乃生窮溟未覩大  
明運安知至陽精願從列仙徒散髮倚雲屏三花漱雲  
液五內含晶熒回觀羅浮圖陋哉山海經

海上讀書

欽定四庫全書

卷一

浮雲薄海色萬里如秋空青蒼杳無際島嶼蟠蛟龍上有讀書者結茅誰與同朝食海上霞夕友滄江翁乘槎嗟尼父把釣思任公猶慕魯連子不受却秦功千金若土壤清名弔高風愧予老儒術白首且相從

飲酒

儒生好奇古出口談唐虞倘生羲皇前所談乃何如古人既已死古道存遺書一語不能踐萬卷徒空虛我願但飲酒不復知其餘君看醉鄉人乃在天地初

金雞巖僧室

遠公青蓮宇百尺構雲闕一徑入松蘿山泉濯苔髮石  
房彈玉琴清響在林樾夜來滄海寒夢遶波上月微吟  
白雲篇高興了未輟未能悟聲聞安得離言說

遊芙蓉峯

密竹不知路渡溪微有蹤懸知石上約定向松間逢物  
候變黃鳥芑蒲化蒙茸相望不可即裊裊霜天鐘

同周秀才玄與東白明遠二上人期宿芝山不

至

屢居厭紛擾恒思宿陰岑夙期道門友共茲清夜吟彈  
冠起新沐微風披素襟行行止空門夕景倏已沈不見  
雲中僧虛堂閉煙林應物本無往焉知來去心良會既  
已睽中情一何深詠歸值新月聊復鳴吾琴

泛舟西江

積水可利涉方舟況同乘悠然西江上遂望雲中僧出  
浦見落日前崖陰始凝秋風忽颯沓海雨隨奔騰稍移

流沙河又見夕影澄擁棹向危壁推蓬見古藤枕藉信  
水宿躋攀候晨興茲遊意多愜況也多良朋

題醉道士

黃冠何羽人恍是全椒客一壺常兀兀以飲混其迹歸  
來秋山空卧向松下石誰知郡齋人含情正相憶

經東山別墅

野墅在東山經過感疇昔縱橫醉時墨猶在池上石林  
氣颯以涼山容淡將夕緬懷攜手人念念不能釋

寄丘令

海國民俗古清朝民物閒  
況茲得良牧理人絃誦間  
吏散日已夕雲歸鳥隨還  
高齋蔭嘉樹橫琴對遠山  
伊余安蹇劣歸休謝朝班  
出處雖異途雲林近怡顏  
茲焉仰高風望望心所攀

送湖南歸粵

志士本激烈況當離別情  
直氣不得發逢秋吐商聲  
浮雲蔽長空驅馬去孤城  
廣川無輿梁一葦詎能橫  
將尋

故山隱自芟荒草耕蠹書束高閣龍劒日夜鳴行路由  
正途能使山岳平端居息機心卧聞螻蟻爭知君重交  
結臨分吐平生

斬蛇劒

秦氛熾天地大澤蟠蛇蜒潛龍厄初九鹿迹方茫然千  
里送徒人三盃拂龍泉紫劒混赤精紅光吐青蓮壯哉  
三尺鋒可以摧金天粉首明月中飲血秋風前素靈何  
嗷嗷老淚飜蛟涎芒碭起風雲咸陽若浮煙揮洒六合

清提挈神氣完始知百鍊鋼永與金刀堅

赤壁

曹瞞窺漢統東面朝諸侯鼎足猶未分屯蒙迷九州桓  
桓長沙裔歛起揮戈矛兩雄不並立固知寧相謀朔風  
吹旌旆飛霜肅貔貅飲馬涸天塹投鞭填山丘建鄴既  
震蕩羽檄如星流衆議徒瑣瑣獨斷誠嘉猷拔劍碎玉  
几揚旗走車舟周郎拂白羽談笑有良籌馮夷鼓駭浪  
天吳扇雄飈烈焰蕩萬壘飛灰喪千艘論功何顯赫返



駕誠包羞再光東都業一洗瘡痍往事既漫滅山川  
尚綢繆昔聞龍虎爭今見麋鹿遊峭壁絳海月洪濤漲  
清秋訪古弔陳迹開樽發冥搜醉來卧煙靄天地如蜉  
蝣

題草澤遺書

買斧入城市伐木歸中林中林多樛木實勞匠者心林  
深間無人清風聞嘯音雲濤既浩蕩龍虎亦悲吟筋力  
既不惜但恐白日沈願言祕太朴俛首從哇淫

酒醒

酒熱中夜起散髮微風前煩襟忽沖散高咏蒼涼天湛  
池和露藉虛庭留月眠寧知明日事聊復一忻然

曉登金雞山呈王六博士

劍客無所懼登高眺清曙於時值搖落況乃朋遊阻闕  
河一千里飛鴈杳難度積水明秋空荒山落寒楚荒涼  
誰問俗慷慨即懷古長嘯歸去來餘意在蘭杜

送尚抱灌往閩南采詩

子生草澤間鼓腹歌唐虞奈何際板蕩奮劍當前驅千金酬壯士白璧買良姝放浪裘馬間嗜酒縱携蒲市朝既變更部曲歸里閭三十始讀書謬為章句儒閉門謝賓從窮巷生寒蕪南山既嘯傲擊節聊自娛故人西北來將歸滄海隅自言河岳英以俟觀風車忽忽僕馬疲寥寥歲云徂積雪照天地嚴冰寒江湖祖席臨東門欲發仍躊躇贈之五雲章飲以雙玉壺

答黃逸人

大道如砥平我車不方軌明時世景清夫子乃蓬蒿有  
客天上來為說黃金臺所市既駭骨所羈乃龍媒五月  
上武陽炎風焚大荒豈伊道路難欲往河無梁華門逢  
君子酣歌日中市披髮行且吟時人盡驚異既知歸日  
落欲往秋風作誰同甯子嘆且效榮叟樂離別遠將歸  
涼風吹布衣南飛有鴻鴈毋使信音稀

春日同諸生野飲效陶體

始春風日嘉出門竟何之所忻攜諸生駕言陟嶽嶽谷

風已嘯萌好鳥亦鳴枝  
蔬果屬時新有醪已載  
卮中觴發意氣列坐各  
言詩悠悠天壤間斯樂  
希浴沂

夢清冷臺寄冶城舊遊

羣山際海上道上獨蒼  
蒼上有清冷臺碧蘿蟠  
石牀伊昔盛冠蓋琴樽  
此翱翔暮色海天冷秋  
聲松澗涼今來阻登臨  
獨有夢飛揚題寄同心  
侶願因南鴈翔

岷峨秋晚

岷峨一千仞秀色橫清  
秋雲蟠隴蜀盡水入巴  
江流旭

日海上來蒼蒼樹色浮陽厓氣已變石林陰未收疏鑿  
有古跡登臨仍壯遊落日下層巔懷哉神禹憂

雙竹軒

開軒遠山際讀書脩竹陰以茲歲寒枝況此君子心雖  
無萬竿玉庶比雙南金天風有時來鸞鳳相和吟外直  
秉堅操中虛含素襟何當煙雨夕夢遶湘江深

送黃玄之京

予也夙穎悟十五知論文結交皆老蒼稚爪攀脩鱗冥

心三十年尋源頗知津探玄始有得服膺如獲珍誓將  
覺後生庶以酬先民干祿鏞水庠歲星七周循青衿二  
十徒達者唯黃聞三十為禮官制作多述因前年乞骸  
歸甘作隱逸倫業窮道豈遷操危氣愈伸持此欲有授  
二玄乃其人時登烏石山眺遠滄海濱逸興發猿嘯閒  
情投鳥羣既與簪紱疎頗同緇錫隣朝遊必竟夕夜吟  
常達晨放曠宇宙間外視埃壘身飽斟日動爵劒舞風  
披巾醉來各鳴張揮洒如有神坐或藉青草倦應眠白

雲大運迭盈虛人事常參辰詎知同心者胡為遽離分  
于時維孟冬膏車戒征輪借問子何之囊書上成均執  
手念門友登堂辭老親驅馬西郭門祖帳螺江濔朔風  
捲行旆木脫波粼粼請為壯士吟庶以攄中懃丈夫志  
四海況茲觀國賓惜別語刺刺無乃兒女仁壯懷何以  
贈臨岐解青蘋

終南積翠

終南太古色積翠無冬春陽厓俯荆楚陰壑開函秦碧



樹曉未分蒼蒼散參辰下蟠螭水龍上有避世人有時  
浮爽氣拄笏可攬結安得構精廬談經對松雪

方巖朝曦

天地有神氣方巖東南青高標窮碧落連峯走滄溟深  
探地無際遠見日初出蜃氣乍蒼涼龍光猶恍惚始知  
至陽精明明含中虛沿旋綴陰魄斡運乾坤樞願言吸  
晞景庶以永年歲手把扶桑枝身騎六鼇背茲焉對畫  
圖飛夢遶方巖一笑天雞鳴晴憲已東白

閩中十子詩卷一

欽定四庫全書

閩中十子詩卷二

明 袁表

馬熒 編

林膳部集二

五言古詩

贈彈琴黃生

高館敞秋夕而多脩竹林讀書有時閒游心復鳴琴露  
月稍低樹清風遂彌襟特茲保貞素庶以忘華簪

溪南小隱

夙性尚幽素卜此林泉居雖無珪組榮而有山水娛靜  
言一室中撫已常澹如窓間有鳴琴几上惟素書芳晨  
得朋簪清樽與之俱憩木愛佳鳥臨川羨游魚棲神縱  
八表誰言形迹拘惟願榮啓期斯樂同只且

寄龍大潛效韋體

夙負偃蹇志共懷林下心誰言塵事縻以茲曠幽尋夏  
火方云始索居念朋簪薄攜一樽酒命駕來城陰湛湛

晨河流依依嘉樹林  
晤言有時閒揮觴共鳴琴  
久要或可冀希哲信難任  
君懷諒不乖惠我瑤華音

送黃秀才歸西鏞

外貌苦物役中心貴  
所知如何千里別  
值此清秋時驅車弔古臺  
暢飲黃金卮疾風海上來  
黃葉四散飛鴻雁叫蘆渚  
蝶蛸結桑枝感候意方戚  
送遠神乃馳離隔勿復道  
久要長若斯

富春釣臺

維舟富春渚舒嘯登崔嵬不見羊裘人空餘垂釣臺苔  
色石上古秋聲松際哀清風猶可仰落日滿蒿萊

夜酌邑庠留別

高梧結朗月密竹深寒煙虛堂敞清夜桂酌開華筵論  
心機暫忘念別情已懸值此羣動息始知詩境玄行當  
泛蒼波去矣徂山川落葉擁戍壘飛霜清海天鴻燕有  
時還傾蓋知何年願持松柏操永與金石堅

同周孝廉夜宿郡庠有述

乞身共棲遲聚首殊契闊予卧清溪雲予弄滄海月人  
生駒隙耳歲月坐超忽欣茲一樽同信此百憂輟晤言  
不知疲高歌清夜發久要諒無違保已終華髮

留別諸彥

秋堂閔虛寒晚竹引深翠瞑然孤燈坐興與一壺對天  
冷霜滿襟露飲月窺醉曲盡別意深相看發長喟

精巖寺

香刹象天界名僧辭世氛一峯獨凌削衆壑相氤氲作

禮向金仙宴林投鶴羣山犬銜人衣却走避腥羶於時  
春向暮林亭藹餘曛蒼然草木氣盡濕西江雲登閣見  
千里眇懷滄海濱山鐘忽播蕩應此悟音聞

訪陸隱君不遇

結屋依兩崖疑是秦人家不見山中人風落青松花掃  
石調素絃尋泉飯胡麻願因玉麒麟緘書投紫霞

經延平津

昔人雙寶劍經此化神物晉室已寥寥劍光猶未沒紅



纏斗牛氣黑漾蛟龍窟千里一寒流馳波向溟渤玄化  
宵莫測沴氣閉復開有時潭水上白日飛雲雷伊余探  
靈異狂歌負奇懷回船向明月浩蕩秋風盃

別龍秀才

龍生不羈者愛士能開襟每醉玉壺酒復為梁甫吟訪  
余鏞水陽又將歸故林秋風樽前別落日川上心四郊  
已蕭條千里無飛禽離思苦難說望遠猶登臨

同王六博士宿煙霞觀

昔人煉金鼎此地餘還丹至今風篁鳴猶疑下笙鸞出  
嶺訪靈異投山宿天壇一片月色古千秋松影寒醴泉  
為我酒丹霞為我飧都無世人夢但佇風中翰夫子苟  
有意相期此投冠到家興未已更取吾琴彈

遊玉華洞

真仙構靈宅洞府何嵌空入洞可十里流水咽其中陰  
島濕花露石門度松風怪石變萬狀尋源竟無窮有時  
起雲霧微徑又不通觸目極杳靄游心但鴻濛路盡忽

有天容光澹空青蛻出風露外了然心目醒幽興殊未  
已又還宿雲扃飛夢即蓬島冥心祈道經終悲向朝市  
塵鬢秋星星

翠簾山天湖

翠簾高凌天峯麓曠且平何年此蟠龍遂成秋水泓呼  
吸納元氣溟濛變陰晴雲雷地中起日月波上生上有  
空僧巢巖栖煉神形寥寥水月觀洞見心胷明我昔凌  
天梯恍若登赤城浮杯動松影發笑回天聲從茲便高

舉永極雲霞情

同王六入西山尋白雲僧

秋山晚蒼蒼引興白雲際方聞出谷鐘未返沿源騎躋攀霽心目始到三摩地苔色陰際寒松聲靜中細空僧此岩棲心寂跡如寄經誦有時聞了了見山翠抱琴者誰子夙性貪幽致雲卧復何為冰絃寫秋意西峯倏含景石榻又假寐身寄孤鶴巢夢如幽蘭氣夜分氣候白隱隱月初至陽磴澹空明陰林破深邃久懷緇錫隣頗

與雲山契章甫如可投期君訪靈異

訪玄章師不遇

真僧駐錫處雲牀在西峯應物無所住安知來去蹤今  
來結清謠又向何山逢白日無經聲金飈但鳴松懸思  
永今夕杳靄秋天鐘

秋夜憶周模

傾蓋一分手沈思長在襟況茲離居夕復此秋城砧露  
下葉初落草根蟲又吟雖云感物候終念曠幽尋劒水

東南流故人千里心無因達尺素夢遶青楓林

道中偶詠

林館夕暫休星駕曉仍發沈沈樹若煙浩浩溪如雪白  
首倦長途青山笑予拙

秋夜期廬道士見宿不至

掃石待瑤駕焚香立陰階如何道機熟反使音期乖  
色帶疎竹秋聲連夜齋無因問丹訣默默此時懷

宿黃梅五祖寺

佛祖說法處迴與諸天鄰  
珠宮歷浩劫桂殿餘真身  
登攀訪靈異禮謁知宿因  
地遠泉石怪人間猿鳥馴  
松杉覆窓戶濕竹清衣巾  
花雨出深夜天香來暮春  
久知簪組妄思與緇錫  
親所希慧燈影為余照迷津

遊海上瑞巖

海國橫秀色茲山何鬱盤  
黃金亘樓觀積翠開峯巒  
登高恍神遊駐目窮遐觀  
地迴雲物古天秋松桂寒  
於時灝氣清東溟淨波瀾  
精思落天外回飈生羽翰  
嘗聞有

靈草可以駐顏顏且畢濟時畧金梯期再扳

石竹山紫雲洞

羣峯際東海一峯凌紫雲昔人煉丹處石室莓苔紋飄  
飄龍虎車即此上丹闕惟留白鶴影宛在青松月下有  
靜者廬其人頗淳龐一水落天鏡萬化明石窻藥食有  
時暇還來扣巖闕心與魚鳥樂身隨天地閒伊予困流  
俗十載未應還長歌賦招隱夢遶天涯山

題徐漬湘潭離思圖



荆南不堪別孤棹向何處人分鴻雁秋樹帶瀟湘雨離  
思亘重襟登高但凝佇

送吳士顯

吳生跌宕人脫畧當世事欲識平生心悠悠江海是布  
衣何飄飄孤劒千里至斗酒未及歡看雲起歸思長風  
吹古城寒石下秋水分手從此辭車塵望中起

酬外兄林大見寄

衰孱謝時耀索居久荒蕪顧茲升斗祿遂與田園疎文

墨互紛紜舍館若僧居齋中無餘物草木盈前除緬懷  
桑梓遙況與親愛迂舉頭望飛雲清興與之俱飄飄西  
南風翼彼五雲書豈惟比兼金欲貺無瓊琚撫運感離  
間銜哀念先廬泉臺未及封舊業應翳如失路已窘步  
孤生嘆多虞仰慚南枝禽俯愧同隊魚沈憂髮就種撫  
事心已痛裁詩重於邑安得膏吾車

飲馬長城窟

羸秦亂天紀紫塞徒經營千秋扶蘇血脈脈流泉聲吾

聞渥洼龍中天應房星所以千里駒翩然來漢庭

題江上琴興

太朴本無事太音元希聲何如伯牙子尚懷山水情我  
有太古調欲托絲桐鳴人間正寂寞毋使蛟龍驚

同鄭二宣江上泛舟

載酒入江邑酒多江復長酣來散予纓濯向春流香東  
壁過疎雨西崦殘夕陽猿禽相嘯叫雲水共清蒼夕景  
更汎覽客程殊未央魚風葦上起蚌月波中光嘗以事

伴與永期名迹忘乘槎予豈必聊復咏滄浪

今日良宴會

今日良宴會歡娛在須臾念我平生友日夕萬里途  
廣筵羅雕饌酣歌鳴玉壺對之豈不樂相見生嗟吁  
勲業苟未樹綢繆將焉如

江閣秋雲圖

山容初斂夕雲氣已歸壑何以散沖襟孤琴坐江閣  
美人期不來天寒楓葉落

邯鄲行

玉貌邯鄲女少小來深宮春芳羞百媚秋水明芙蓉君  
王一愛惜白日生春風春風不長好妾顏豈長保一作  
玉階別衷腸向誰道憶昔少年夢不向邯鄲飛今日還  
思君時時望金扉雖作泉下土悽悽何所依

門有車馬客

門有車馬客徒侶何輝煌銀鞍耀白雪寶劍明秋霜借  
問客從來謝官歸故鄉只言昔別君君年正春芳聞言

謁天子聲價靄玉堂龍顏霽霄漢虎變麇文場寧知一  
失意白日沈夜光秋鬢非舊絲映帽多星霜區區附驥  
尾薄宦歲月長解組且歸去投君叙溫涼嗟我聞客言  
慚愧獨彷徨大鵬反鍛翮燕雀終翱翔扼腕勿復道長  
歌臨碧湘

題張少府夢澤高秋圖

夢遊秋水碧醉眊晚山閒短棹發吟思酣歌放狂瀾浮  
雲秋際來藹然芳樹間青蒼太古意天地同瀾漫荆門

正西上樹古生早寒漢水日東逝冶遊多苦顏鴈思落  
芳渚漁情寄清灣願期同心人結屋江上山

泉石清逸

久為泉石人了與世塵絕朝飧清澗霞夜弄碧蘿月掃  
石奏吾琴尋泉飯胡麻長謠古苔篇似是仙人家陶令  
歸栗里安石棲東山心將槁木灰跡與浮雲閒有時窮  
躋攀落日更吟眺碧草藉醉眠玄猿引長嘯冥棲笑流  
俗何用囊中名千秋放意氣永極雲霞情

題秋江漁釣圖

移舟向潭石投釣臨寒流餘懷本澹蕩況此滄江秋  
白  
日既濯濯清颺何瀏瀏適意非在魚所希與神遊悠哉  
共恬淡惟應沙際鷗

雲林清隱

夙性抱高致端居厭華簪尋泉鑿石壁結宇依雲林  
經  
鋤有時間班荆坐樾陰清颺引長嘯白雲勸孤斟處  
默  
謝流俗任真曠冲襟惟應同調者聽我丘中琴



海天跨鶴

滄溟控東極，滉漾寬扶桑。飄飄鶴上仙，御氣以翱翔。碧落為我益，丹霞為我裳。放神逐九有，吸氣調三光。驂鸞笑羸陋，策駿嗟穉荒。逍遙大羅天，歸來良未央。

送劉子服兼呈菊溪諸知己

路歧一為別，壯心將奈何。雲山寄遠迹，歲月空蹉跎。緬懷建溪客，離憂空沈疴。孤松偃磴壑，荆棘結巖阿。巴唱銷白雪，秦箏妬雲和。遂令懷古調，感嘆一狂歌。鹿門自

耕作東山卧雲蘿褰裳擷芳芷投竿餌清波浮雲自東來青天鬱嵯峨明月遙古意芳樽恣吟哦雖云念白首終歲守蓬窩

海門秋望

雲崖聳高寒攀躋覽溟海試拂龍唇琴餘音散蒼藹月搖波影中葉度秋聲外矯首蓬萊宮仙人笑相待

齋中曉起

颺颺城鴉散瑟瑟戍鼓絕空庭絕無人衣上有殘月清

池盥漱罷高韻風中發爽氣山前來吾襟抱冰雪

遊武夷九曲

秋風泛瑤棹愛此佳山川九曲沂流月數峯標暝煙開  
闢自天地飛昇有真仙石上蛻金骨雲中鳴夜絃伊余  
探古迹得復窮幽玄間招木客飲醉向天壇眠不見紫  
陽翁徒歌白雲篇予懷在漁釣即此應忘筌

夏日登宿雲臺有述寄霜月上人

投簪返初服躡屐謝紛擾永言卧丘壑庶以狎魚鳥茲

臺夙所憩磴石出煙篠  
況逢朋簪盍燠景共臨眺  
前瞻極空濶下瞰洞深窅  
地古雲木殘天長海山小  
真僧此冥棲宴坐閱昏曉  
喻心青蓮淨說法天花繞  
願聞微妙音意泯萬緣了  
豈必東林人相逢可同調

九仙山樓觀

仙山有樓觀虛爽軼浮埃  
昔日九仙人跨鯉茲山來  
赤鯉去不返仙人安在哉  
空餘彈碁處白石生蒼苔  
至今羽人居往往聞風雷  
檄雨古壇暝禮星寒殿開  
常聞至

人言內景融春臺羣生若芻狗大道如嬰孩  
駸車與天接豈但登蓬萊

登清泠臺

吟秋宿絳月際曉登清泠揮手援碧蘿騰身棲翠屏  
長風吹雨來不見羣山青鳥度白雲濕龍歸滄海腥  
真僧此巖棲觀空靜襟靈竹塢見曝衣花臺聞演經  
沃以甘露言迷途醉而醒願言割茲愛永也投禪局

同諸生登絳月蘭若

金人青蓮宇乃在白雲裏久與名僧期乘閒却來此入  
門聞經梵絃壁見巾履落澗泉影紅侵廊蘚花紫海天  
正南豁一望見千里獨樹川上浮孤煙島邊起予生況  
多暇所性樂山水真賞非外求冥心巢居子

題任生水南山房

新安山水郡昔賢邊豆鄉志士應昌運幽人潛葆光青  
冥南山遠綠縵春溪長世外鑿霞壁雲中開草堂經鋤  
有時間方舟復鳴榔鳥度鏡天淨人間潭水涼尚想鹿

門隱猶思愚谷藏  
珪組苟無心禽魚亦相忘  
伊余懷故林  
碧蘿盤石床  
因君賦招隱  
鼓枻歌滄浪

題異上人絳月軒

迢迢青蓮宇  
寂寂野僧定  
片月挂虛空  
羣厓破陰暝  
雲窓晃玉毫  
露幔捲金鏡  
色映天影寒  
光凝古潭淨  
常聞止水觀  
可以喻禪性  
夜久悟音聞  
空山響煙磬

夏日遊幻住蘭若

青山古城曲  
溪水相縈紆  
尋山避燠景  
喜得金仙居  
水

石翳洞古松蘿覆窻虛俯見蘚痕積遙知人迹疎願以  
青蓮界永期紛垢除流咏發天籟洗心清道書遲遲至  
棲鳥望月歸吾廬

夜宿郡齋水亭呈林八博士

孤琴水亭夕客至罷鳴彈況有樽中醪斟之罄情懽濯  
足向清泚披襟散塵煩仰見海上月兼之天籟寒齋舍  
何蕭條蓬門若丘樊深竹讀書處百蟲鳴夜殘予懷良  
已舒為君咏幽蘭



[illegible]

欽定四庫全書

關中十子詩  
卷二

十六

關中十子詩卷二

欽定四庫全書

閩中十子詩卷三

明 袁表

馬熒 編

林騰部集三

七言古詩

雪蓬散人草書歌

雪蓬散人有媯裔翰墨遊心與神契摹臨祕帖追晉風  
揮洒雄文明古制華門鐵限人爭求荒郊瘞筆應成丘

嫵媚雲霞晴變態傾斜風雨寒颼颼伊予與君共鄉縣  
結交自昔忘貧賤銜盃拓落膽氣豪江樓野寺書題遍  
借問君書初若何君言妙悟應聞歌諧音本自車振鐸  
渙汗有類風行波迺知至理無不寓要在高人會其趣  
古來入室惟逸少後者升堂有懷素當代如君誠亦希  
莫嘆蹉跎一布衣有錢沽酒與君飲醉卧目送孤鴻飛

寄王六校文兼似吳二太守

京師三月春雪飛雪後餘寒添著衣曹官祿薄酒苦貴

一飲百錢恒不醉忽然停盃憶鄉里美髯校文最知己  
作詩判不讓高岑醉後狂吟狂欲死有時忽得意竟上  
金雞山彈琴酌酒送飛鳥心比白雲閒更閒虎頭巖前  
柳拖地龍池溪上花滿灣醉歸騎得將軍馬城上烏樓  
門未闕白頭太守別來久別後還能相憶否詞賦終為  
紙上塵功名不及盃中酒芭蕉葉長近何如前日人來  
不寄書莫言閩海少飛鴈何事秦淮多鯉魚

寄蔡殷

少年所性尚遊俠夜讀古書朝射獵相逢然諾重千金  
性命由來輕一葉自言濩落長如此豈謂年華若流水  
當時意氣何足論今日為儒人共鄙以茲俯仰向時流  
窮居古巷仍百憂拘鈐禮法坐桎梏鞭撻童稚生仇讎  
浮雲世態我何有寧甘落魄耽盃酒閔子長懷汶上田  
桓公漫賦湘潭柳日夕長吟思故山樊籠尚掩沖霄翰  
知君懷抱亦如此一為君歌行路難

相浮丘生

浮丘生能遠遊不學羽客棲丹丘挑簷荷笠來滄洲我  
昔冥棲向溟渤攜書共讀東山月舊遊冠蓋半凋零見  
子翻令心內熱羨子有遠志放形天地間扁舟濯足望  
雲海短策振衣登雪山太行北上連鴈門燕臺鄴宮無  
復存國士由來死知己令人感激思平原諸侯門深少  
知遇回轅又復歸南楚醉裏行吟七澤秋燈前卧聽三  
湘雨吾知浮丘心迹竒世人悠悠那得知草書古篆更  
神妙擊劒彈碁無不為嚴冬別我寒蕭索尊酒都門為

金  
卷三  
君酌車輪遙遙忽不見唯見千山雪花落

送林子山之閩中覲親

釣鱸橋頭流水香冬青花開榕葉涼壚頭酌酒送行客醉後  
狂吟成短章世人懷別多慘愴念君此行何坦蕩云是嚴君  
在武威十年著盡遠遊衣鴻鴈絨中空寄遠魚龍川上苦思  
歸以茲出門心草草拂衣更向長安道古戍飛霜馬色寒重  
關曙月雞聲早自古秦川亦壯哉三峯華岳掌中開溫泉綠  
樹隴隴見渭水黃河曲曲來邊庭相見悲復喜白髮依依問



鄉里九月狐裘尚覺寒  
千鍾黍酒難成醉  
聞道東還未有期  
隴頭好寄折梅詩  
翻思人世皆為客  
何必臨歧是別離

贈曾錮

二十讀書通大義  
三十結交江海士  
不學囊中一豎儒  
寧為世上奇男子  
同遊冠蓋多如雲  
佩章綰綬何紛紛  
東序詩書崇四術  
汝南節義宗三君  
問君拂衣何太早  
知君有親今已老  
鄉夢不離青浦雲  
歸心只在方山道  
城南柳花吹客衣  
車驂祖餞生光輝  
共傾濁酒江上別

獨攜明月山中歸歸來鄉井宛如昨畊石飲泉貧亦樂  
閉戶從教水鳥啼垂帷不省山花落達節非關學隱淪  
至人舒卷道為隣君看古來霄漢上多是尋常畎畝人

賦得獨樹邊淮送人之京

君不見秦淮水流東到海淮邊獨樹如車蓋九月微霜  
赤葉乾枯枝颯颯鳴天籟枝上啼鴉散曙煙枝頭殘照  
咽寒蟬離人留飲停車騎俠客相逢掛馬鞭南國高僧  
從此去駐錫雨花臺下路一飯淮邊洗鉢時六時宴坐

祇園樹野鶴孤雲任去還  
禪心不道別離難  
山中亦有長松樹待爾青青共歲寒

懷李郁

李君本是清狂者十載畋漁向原野  
梅生豈厭官位卑  
閔子由來宦情寡自言濩落可終身  
誰知尺組能縻人  
朋遊失路各分散妻孥寄食家仍貧  
荒涼廨宇炎江表  
椎髻山氓語如鳥地隔三苗洞穴多天連  
五嶺人煙少  
三年無書增我憂憶君翻令懷舊遊  
開元寺裏猿鳥莫

洞天巖前木葉秋襟期相遇每如此魂夢悠悠共千里  
白髮關山自月明青山茅屋空流水八月江南鴻鴈飛  
天邊誰寄早秋詩不如飲酒且安命振翼雲霄尚未遲

過高逸人別墅

識子何不早見子即傾倒世人意氣不相合顏色雖同  
心草草子有園林東海濱香名滿耳人共聞梁鴻避世  
身不仕孔融愛客家常貧茲晨飲客青山墅新壓葡萄  
酒如乳綠樹穿窻烏當譌紅條拂地花能舞醉來興逸

無不為投壺擊劍仍彈碁人生得意有如此世上悠悠  
那得知

月夜聞李生彈箏歌

越客本浩蕩秦箏何激揚浮亭子夜月色古一曲萬籟  
鳴清商初聞楚調聲激烈志士報讐思飲血再聞宮音  
如叩鐘魯生揖讓何雍容清和變調有如此俠客聞之  
心欲死銀甲彈來更嫣然金魚脫却渾輕爾吾聞錦瑟  
五十絃相靈夜鼓聲淒然遂令帝子剖其半遺音尚有

秦人傳秦音楚調聲雖異今古由來同一致燕市誰知  
擊筑心吳門孰識吹簫意今夜君聞鼓曲聲百盃不醉  
壯心橫衆賓枕藉秋衾冷獨倚高梧看月明

春夜玄默處士燕集得滿字

三月六日天微和博士水亭乘醉過主人解衣即沽酒  
外史叩壺能嘯歌歌殘夜久星移換新月蒼蒼捲羅幔  
萬事空嗟白髮新一壺共對清尊滿子有園林東海濶  
十載校書甘陸沈平生獨抱飲水節有時或賦還山吟

高齋宴坐探玄默時輩狂馳交不得自分綈袍比草青  
直將富貴輕雲白予本南宮淡蕩人與君交誼最相親  
相逢且盡盃中物遙憶風流席上珍

為廣上人賦歸雲山房

道山老禪七十餘閉門不出祇園居心將明月同清淨  
跡比閒雲能卷舒蕭散浮雲閒更閒因風也或到人間  
晴教海上千峯出暝與天邊一鶴還歸雲寂寂山房暝  
明月蒼蒼僧入定禪心無著雲無蹤一塵不染諸緣空

山中有僧人不聞世上流俗徒紛紛願為松下小童子  
閒與高僧掃白雲

送林汝學之雷州省伯

四月閩南梅雨涼荔枝花開滿樹香青門酌酒送行客  
極浦揚帆辭故鄉君家從父從戎久海外書回驚白首  
離筵正值落花初客路仍逢歸鴈後知君所重在連枝  
觸熱投荒應不辭少年意氣有如此世上悠悠那得知  
雷陽咫尺滄溟近戍卒相逢問鄉信蛟室風來白浪腥



龍淵日落青天盡嗟予有姪亦離居萬里炎荒久荷父  
天涯亭上應相見為報平安尺素書

經綺岫故宮

行人曉飯青山裏驅馬蒼茫經洛水昔聞綺岫盛繁華  
不謂荒涼今若此憶昔行宮初構時梯巖駕壑相逶迤  
美人桂殿夜看月公子柘弓朝射麋翠華一去金門鎖  
露殿飛螢山葉墮往事吹殘牧笛風危基半入樵人火  
今古消沈能幾回春風依舊野花開君王巡狩不復見

禾黍空山鳥雀哀

送王孝廉之京

神如玉壺初薦水氣如大阿新發硎羨君早年即登第  
許君壯節終成名十年落棲衡宇斂翅迴翔待高翥  
知己文章舉孝廉治安有策干明主以茲擲筆翻然起  
祖道車驟若流水客路遙侵朔鴈前鄉情却望江天裏  
客路鄉情兩地分征帆落葉共紛紛君登要路天門去  
我向秋山卧白雲

賦得無諸城送浦舍人源歸晉陽

君不見昔時無諸城荒丘斷隴今人耕陵谷煙沈知幾  
代古人精靈竟何在憶昔無諸全盛時都城百雉何逶  
迤連營國步分秦土繪袞王章入漢儀山河巍巍那可  
恃躍馬屠龍今已矣列國猶傳赤帝封曲臺尚對滄江  
水滄江水流去不還故宮落日不堪看寶衣夜化空陵  
火弓劒秋懸古殿寒故人西歸從此去策馬秋蕪城下  
路欲將陳迹問行人落葉紛紛不知處

送秦山人歸天台

天台山人薜蘿衣，別予東將海上歸。  
心如月塞征鴻遠，興逐秋城落葉飛。  
人間萬事歸來好，脫屣侯門迹如掃。  
樓外孤霞映赤城，窓前片月生滄島。  
飛佩須過鴈宕峯，繫舟先聽若耶鐘。  
丹光夜繞三珠樹，鶴影秋歸五粒松。  
執手河橋酒半醒，小山別後桂青青。  
願祈海上煙霞祕，長保塵中犬馬齡。

鐔上送僧歸衡山

上人孤閒似雲鶴十五出家住衡岳說法能超最上禪  
持心不受羣疑縛世上誰知來去蹤南窺太華北遊嵩  
衲經鴈蕩千峯雪定入峨眉半夜鐘于今戒臘青松古  
猶泛慈航到東土楊柳舟中九曲雲笓笠上三山雨  
昨夜歸心繞楚天西風杖錫又茫然化龍潭畔清秋別  
回鴈峯頭舊日禪

林七欽山莊

此君家住浯水西喬林夾道綠青溪人淳上古大庭世

客到武陵花處迷，深盃盡日見山色。  
高枕四時聞鳥啼，籬根稚筍看成竹。  
階下飛花踏作泥，梓柳折來環樂圃。  
野泉引得灌蔬畦，人間鐘鼎口不道。  
雨裏田園手自犁，已沾雞黍遂然諾。  
豫愁冠蓋將離睽，明日却從城市去。  
林間相送草萋萋。

巫峽啼猿歌送丘少府歸四明

巫山巫峽連三巴，猿啼三聲客思家。  
停舟聽之聲未了，却過青枝猶裊裊。  
野人乍來錦官城，清秋滿峽啼猿聲。

黃牛灘上怨楓落白帝祠前哀月明商聲清列羽聲亂  
倏忽東崖復西澗久客聞之淚欲乾壯夫聽此魂亦斷  
故人歸卧越山雲憶得啼猿歌送君扁舟獨宿剡溪夜  
叫月三聲誰共聞

初秋送友人之治城賦得把字

行人飲馬秋城下魯酒千鍾為君把離亭正值鴈驚寒  
候館仍逢雨侵夜嗟予十年恒壯遊登高弔遠無所憂  
襟期脫畧向知己生事蕭條隨野鷗南宮作吏歸來久

富貴浮雲我何有三品寧論小隱資百壺且醉平生酒  
露島煙汀出水濱風帆桂棹生離分題詩為寄漁樵友  
惜別還看鴻鴈羣

寄陳八叅軍

憶昔讀書融水陽青山影裏開茅堂結交由來重意氣  
使酒或可輕侯王誰言一旦風塵起故里蕭條半荆杞  
立身自許致功名報國誰能論生死爾時正值黃塵昏  
手攜俘首懸轅門春風走馬綠楊路落日臂鷹秋草原



功成期將書幕府當路忌才棄如土部曲營殘殺氣消  
關山夢醒秋聲苦比來為儒逢太清石田蕪沒荒春耕  
當時冠蓋半丘土此日交情結弟兄交遊惟君年最高  
每以連枝勗我曹天邊落日見孤鴈海上秋風吹二毛  
劒水無情入海流憑將雙淚到炎州願為鄉曲牧童子  
與子高歌同飯牛

贈商生

與子交遊最年少羨子襟期可同調醉墨能噓海上雲

春箋會拂花間鳥壯遊海內早知名每以才華動九卿  
丹穴殊看鳳毛貴方諸遠在冰壺清伊予十年歸未得  
貧賤由來愛賓客雖乏牀頭沽酒錢未嘗一日無顏色  
西鏞城下醉相逢南國新秋意萬重石竹山前滄海月  
紫雲洞口夕陽鐘

酬張少府惠山僧茶

南風吹雪柳花飄閨中佳人春夢饒白髮儒生未飽食  
夜眠少困卧終朝清河縣官公事簡憐我邇來愈疎懶

手裏山僧石乳茶題寄齋房豁書眼高枕蓬頭緘未開  
毛骨颯颯秋風來相如漢賦八千字懸河暗誦聲如雷  
山童急走汲井花鎗裏龍涎鳴遠車千日醉魂來斷夢  
五陵酒伴識還家為君一啜感君意鳳髓龍脂世空美  
碧碗滄洲片片雲金莖漢苑稜稜水朝來散步凌仙山  
恍如輕舉碧蘿間九天若到須臾啜何惜神君騎鶴還  
滄海雲帆歌送張少府之京

蜀錦為帆發光彩掛向扶桑之碧海海上仙山十二樓

仙人矯首遙相待船頭錦袍黃鶴仙身朝玉皇遊九天  
長風吹帆向碧落下視塵世浮青煙我昔登雲向儀曹  
釣天廣樂聲嘈嘈夢中折翼下人世悵望雲闕心煩勞  
茲晨送君向雲闕春帆直拂濤山雪解纜朝辭北海雲  
曳裾曉待金門月渺渺雲帆奈別何珊珊紫陌聽鳴珂  
君從雲路騎黃鶴余亦還山卧碧蘿

題桃花馬

玉墀迴立如龍游金鞍照耀雲錦浮  
灞橋浴水落花雨

沙苑追風苜蓿秋  
圉人盡皆輕駉駉  
將軍不復事驂駟  
請看千里噴汗血  
蹴踏風雲不肯收

送林敏歸海上

九月大野黃嫫蛸  
掛空桑城頭立馬  
見千里遊子此時  
歸故鄉將歸滄海  
雲且醉冶城月楊  
柳橋頭酒正香  
芙蓉館裏花初發  
戀此使人歸計遲  
看花酌酒復聯詩  
眼前相遇不傾倒  
別後相思空復為



閩中十子詩卷三

欽定四庫全書

集部

閩中十子詩卷四

五

詳校官中書臣瞿照

助教臣常循覆勘

總校官進士

臣朱

銓

校對官主事

臣陳文

樞

謄錄監生

臣吳

銓

欽定四庫全書

閩中十子詩卷四

明 袁表

馬熒 編

林膳部集四

五言律詩

出塞曲九首

壯遊誰憚遠西北是臨洮  
駿馬銜金勒行人看寶刀  
隴雲吹曙暗關月倚秋高  
早赴防邊壘三軍待六韜



其二

從軍呼延塞勒馬單于臺  
天地兵聲合關河秋色來  
酬恩憑玉劔致遠見龍媒  
旦夕邊城上喧喧笳鼓哀

其三

玉關秋信早未雪授征衣  
王者應無敵邊塵不敢飛  
三河兵氣盛五道羽書稀  
日晚笳聲發將軍射獵歸

其四

單于秋近塞驃騎遠臨邊  
吹角風沙動揚旌日月懸  
驚

雕防獵箭戰馬識烽煙昨夜旄頭黑前軍得右賢

其五

驪馬畫弰弓生為北塞雄探兵千里外捉騎萬人中虎  
帳秋懸月龍旂莫颭風歸來領旌節立在未央宮

其六

大漠窮陰外孤城蒼莽間星河秋近塞雪電夜沈山戍  
久戎衣綻時清列燧閒近聞邊塞騎不敢問陽關

其七

欽定四庫全書



關中十子詩  
卷四

衛霍邀勲日三河聚控弦陣雲寒壓地獵火遠燒天玉  
帳分旗直金戈枕月眠羽書飛報捷天子在甘泉

其八

十五薊門行能探點虜情潛兵秋度磧牧馬夜歸營苦  
霧沈旗影飛霜濕鼓聲昨來承密詔東築受降城

其九

煙塵起西北驅馬到長城萬古征人恨秋風隴水聲雪  
埋金甲重月照寶刀明昨夜聞歸鴈中原有弟兄

擬李翰林宮中行樂

柳色浮金殿花香近玉樓  
嬌鶯聞荳石語燕傍瀛洲  
旭日明仙仗香車映御溝  
笙歌何處響還向未央游

月

玉宇淡悠悠金波徹夜流  
最憐圓缺處曾照古今愁  
風露孤輪影山河一氣秋  
何人吹鐵笛乘醉倚南樓

送高郎中使北

漢使臨邊日天驕已請和  
看花辭紫陌犯雪度交河水

草留行帳雲沙想玉珂誰知清漠北婁敬策居多

擬唐太和公主和番

粉淚辭丹禁紅顏冒虜塵南天惟有月北地更無春  
笳鼓凝芳夢軒裾掩翠顰年年桃李月淒絕舊宮人

訪邵隱君所居

隱君讀書處門巷少行塵竹塢琴邀月花林鳥近人  
衣冠猶古制泉石是南隣散帙多閒日休嫌問字頻

同徐總戎登汴梁相國寺樓

傑閣千尋起平原四望開旅魂秋易斷鄉思醉難裁魏  
國空流水梁園半野苔登高能作賦不獨子雲才

題福山寺陳鉉讀書堂

窮經不出戶一室古珠宮燈影秋雲裏書聲晚磬中開  
窓明竹雪散帙落松風料得無人到焚香對遠公

送王勲銘歸溫陵

遠遊俱未達念子獨南歸萬里扁舟去秋風一布衣城  
鴉隨雨散汀葉逐人飛為報無媒者滄洲意有違

送陳煉師歸龍虎山

鶴書歸未久秋思夢瑤峯  
海上看山別人間何處逢  
煙蘿深見月洞府暗藏龍  
辟穀方無術憑師問赤松

送蔡大往汝州尋弟

落葉正紛紛秋城客路分  
知君從此去遙念鵲鵲羣  
楚水帆飛雨荊山路向雲  
懸知孤館夕離鴈不堪聞

春日遊道山亭

危亭臨絕頂勝槩昔曾聞  
野酌薰花氣閒心狎鳥羣  
簷

前看落日衣上見歸雲半醉題詩去仙凡下界分

遊樓雲湖禪室贈日東主上人得心字

東海到來日西山始布金構雲天路上標月夜湖心問  
偈逢樵客忘機狎野禽寥寥塵想絕相對坐禪陰

遊天王寺得王字

金門辭隱吏寶地謁空王碧磧飛龍樹青山遶鴈堂露  
吟蘿卷幔雲卧石為牀莫嘆春歸盡天花晚更香

西峯寺



西峯雲外寺鳥道薜蘿蟠水接花源遠山藏古殿寒石  
牀閒聽雨野佩或紉蘭莫怪棲遲久南宮已絳冠

湘南秋思圖

蒼茫臨極渚眺望黯離愁湘南一葉下始覺天地秋  
瑤草已云暮碧雲殊未休不見林中士緘情投白鷗

九日登臨

不到寺已久入門籬菊開山容帶紅葉鳥迹遍蒼苔  
臥掩維摩室吟登般若臺慙非陶靖節誰送一樽來

同倪十宿洽公房

一入維摩室逢人宿鶴羣鳥驚春嶂月花卧夜溪雲漱  
齒發清諷焚香了梵文冷然鐘磬動應得悟音聞

題周可仁滄洲趣

隱居鮫室近日夕見滄洲吟處月生海坐來風滿樓忘  
機能狎鳥適興或垂鈎予亦乘流者因之發棹謳

秋夜同林四景宿煙霞道院

入山塵念空清夜宿琳宮高枕薜蘿月銜杯松桂風衣

冠人世外天地玉壺中君但頻來此應逢洗髓翁

題碧蘿山房

一入煙蘿去終年獨考槃竹泉宜夜聽松月耐秋看桂  
酒邀佳客荷衣護早寒向予相顧笑持贈碧琅玕

紫騮馬

將軍紫騮馬幾度出安西積雪埋龍臆河水響玉蹄百  
戰功堪並千金價自低吳門秋日晚長倚北風嘶

龍山亭

新亭依絕壁，隱隱見游塵。  
詎識鳴琴吏，能邀落帽賓。  
銜杯山翠晚，散帙鳥聲春。  
自愧非王翰，何由遂卜隣。

滄洲漁子

孤榜傍芳洲，潮回網罟收。  
天清吹笛夜，江闊叩舷秋。  
欲識忘機處，于今已狎鷗。  
塵纓思一解，因子濯清流。

訪羽士黃庭賦梅峯卧雪

梅峯清絕地，中有學神仙。  
日晏無雞犬，雲間枕石眠。  
秋風松子落，夜月磬聲懸。  
蝶夢遽然覺，無言但草玄。

行脚僧

朝衡暮復嵩那却白雲蹤  
度磧逢馴象浮河亢毒龍  
衲經何限雪山過幾多峯  
年老無筋力方懷故院松

樵上逢黃逸人

山徑分風袂秋城冒雨逢  
自言燒藥處應在最高峯  
故業連衰草空齋隱莫蛩  
知君同苦節獨有歲寒松

夜宿芙蓉峯

香剎瞰林丘逢僧信宿留  
風簾乘月卷露簟犯涼收  
宿

鳥微喧曙明河澹瀉秋一經空寂境人世漫沈憂

別鄭處士

叅軍趨幕府上將遠徵兵  
征旆隨春色鳴橈雜海聲  
桐花城外曉漳水霧中明  
故吏如相問毋煩道姓名

久別王六博士

少年為俠客晚節著儒衣  
故里交游盡天涯相見稀  
汀花隨桂擢江月照金徽  
獨有南枝在聊同鵲夜飛

留別蔡秀才原

別離無遠近暫去亦傷神正是千山雪誰悲獨往人江  
空螺女夜花暗冶城春不見同遊侶酣歌淚滿巾

塞上逢故人

五陵攜手罷匹馬各天涯出塞難為客逢君似到家後  
期如夢寐前路正風沙只好長安陌垂鞭醉落花

月夜酌別龍秀才

共向孤城別愁為永夜吟一竿滄海去千里白鷗心短  
髮秋同老清樽月共斟冶城多酒伴遲爾寄徽音

贈彈琴吳生

之子蘊秀氣能彈綠綺琴坐來秋月下如聽水龍吟一曲動天籟七絃傳古心他年江海上勿謂少知音

送林十朋之京

祖帳岳江濱空嗟客路分一經推歲貢千里惜離羣獵近梅欺雪天寒鴈斷雲玉堂逢掖貴雄筆看摛文

海上有述呈冶城諸友

漲海窮炎裔方舟利涉勞島青雲樹合潮白雪山高挂



席嗟蓬梗分簪念爾曹始知川上喻逝者自滔滔

懷黃玄

別去情何限憂來淚滿襟人皆知點玉孰與辯疑金月  
照吳門樹霜飛建業砧最憐詩社散悽絕獨長吟

憶鄭二宣時往交州

旅棹若乘空春遊近日東遙憐滄海客共是白頭翁雨  
霽魚吹浪天遙鶻借風清泠臺下路樽酒幾時同

遊煙霞觀

不作南宮吏來從物外遊  
閒傾松葉酒醉度菊花秋  
谷響疑天籟霞綃結海樓  
下方塵市近俯檻笑蜉蝣

夜飲王六博士宅留別

王喬能愛士留客酌胡麻  
予亦蓬蒿者憐君意氣賒  
碧階流月色綠竹拂霜華  
明日滄溟去雲帆絳海霞

江上寄巴東故人

我憶巴東客長為江上吟  
楚雲將夜夢湘月寄愁心  
落日青楓樹秋風白帝砧  
遙傳一紙淚讀罷想沾襟

送卞從事之河南

翩翩玉面驄去去逐秋蓬  
見鴈辭閩海看山到洛中  
營門閒步月賓館靜吟風  
共說歸來日籬花已滿叢

送黃令之永寧

作牧成周地分攜建業舟  
孤燈聞鴈夕落葉度江秋  
雲路看高翥京塵壓舊遊  
離情如洛水日夜向東流

遊雲隱寺

靈隱知名剎龍宮最上方  
越山當戶翠海樹到樓香  
說

法觀身安懸燈共夜長浮生一何幸乘此禮醫王

宿雪門寺

龍宮臨水國鳥道入煙蘿海曠知天盡山空見月多鶴  
歸僧寺老松偃客重過便欲依禪寂塵纓可奈何

送周生往雷州

寧親歸未得念子復南征風雨孤舟別滄波幾日程挂  
帆辭海國吹笛上邊城旅館知相憶新秋有鴈聲

宿靈異上人房

青蓮開梵宇白社結詩壇  
洞古留雲宿樓虛挂月看  
洗杯泉影落掃石竹光寒  
莫怪棲遲久朋簪念二難

遊方廣巖

玄巖太古色恍若入鴻濛  
一逕攀躋盡諸天杳靄中  
雲歸山殿冷月出水簾空  
境靜離言說泠泠松桂風

秋日同韓玄登凌霄臺

故人多逸興攜手上高臺  
賦為閒居作懷因遠眺開  
秋陰將日去鴈影帶寒來  
歸路瞻衡宇松門掩綠苔

送殷秀才之武功

送君遠行役，覲省入西秦。  
五月臺江水，孤舟去國人。  
蒼山低戍壘，野日暗行塵。  
無限同遊意，分攜汨滿巾。

徵書後呈治城同志

青門初稅駕，紫陌罷鳴珂。  
野興看山盡，花時中酒過。  
同心難契闊，失路易蹉跎。  
又欲羈塵綬，幽期可奈何。

早秋有述寄林八先輩

澤國風雨後，貧居離索情。  
亂蛩鳴曙井，一葉落秋城。  
薤

簞邀涼早荷衣却暑輕清泠臺下路攜手幾時行

春日宴林氏園亭

故人邀客處別野帶林塘身外名堪避樽前迹暫忘  
鳥飛潭樹滿花落野泉香乘興留題去西崦挂夕陽

為釋東旭詠白蓮

淡月瑤池夜微風太華陰翠翻擎露益玉冷墜波簪一  
洗有為法應全不染心誰能招惠遠結社向東林

秋日登平遠臺

蘭若最高處客來開夕憲詩懷秋思集定力壯心降遠  
樹青殘雨歸潮白晚江暝來期宿此斂屨對寒缸

送韋戶侯伯俊

青山慕侯印弓劍掛南陲月滿氍毹帳雲開翡翠旗林  
花春載酒園竹曉彈棊不獨龍韜熟文章爾更奇

擬王維登裴秀才迪小臺

高臺一登眺滿目白雲深況與林間士俱閒物外心嵐  
光當几席秋色上衣襟更待今宵月與君同嘯吟



秋日登石壁精舍

攜琴向何處因訪梵王宮  
潭影漾秋白楓林鳴晚紅  
空啼鳥寂地僻野泉通  
欲辯來時路蒼茫翠靄中

題夕陽孤棹送鄭二之交州

離亭夕景遲遊子去何之  
白髮孤舟別滄溟萬里期  
鄉心春鳥喚旅泊夜星隨  
無限分攜意殷勤唱竹枝

送絕塵上人遊江南

南國隨緣到應無去住心  
聽鐘尋野寺乞食施山禽  
晒

衲梅風潤浮杯瘴海深遠公多古迹只合老東林

夜泊淮陰

泊舟淮水次津樹暗蕭蕭遠火明漁舫長吟倚客簫夜  
鐘聞古寺寒月照歸潮莫近啼猿處愁多夢更遙

送鄭孝廉之京

天書下紫宮星象動璿穹丹穴鏘鳴鳳青冥起漸鴻彈  
冠千里別傾蓋一樽同風雨情何極雲沙路不窮津橋  
迎彩鷁驛樹引嘶驄曙月關河迴晴蕪楚澤空交情懷

契闊直道任窮通知遇期皇鑒君母嘆轉蓬

朱將軍平寇

五嶺連烽火三軍擁節旄專征分虎竹上畧用龍韜地  
險兵聲合天秋殺氣高炎荒開洞穴瘴海息波濤氣益  
干城壯功推敵愾勞陰符資廟筭露布出詞曹振旅聞  
闐鼓休兵看建橐獻俘飛奏捷行見璽書褒

元夕觀燈之作

授厯逢春正張燈是此宵雄藩誇樂事大運屬昌朝錫

酺千家醉含哺萬姓饒兔輪開月馭黿極駕星橋律轉  
條風至陽暄朔雪消宛駒來騷裊洛浦出妖嬈隊合紅  
塵暗香焚紫霧飄金蓮燃蠟炬玉樹度雲謠醉態欺寒  
淺歡情愛夜遙願言歌擊壤萬壽祝唐堯

中秋凌霄臺翫月

福地鄰三島朋簪合二難逢秋能作賦見月即同看地  
迴青天近波澄碧海寬流輝初熠熠載魄正團團桂影  
浮山殿珠光射石欄風來金氣肅河瀉玉津寒搗藥深

憑兔吹簫或駕鸞沾衣垂露葉散步倚雲巒醉飲徒傾  
倒神遊極汗漫自然超世累何必上天壇

同陳秀才登虎頭巖

勝槩殊三島層闌敞八風雲霞開玉壘日月遶珠宮鳥  
道蒼煙外軍城紫氣中山河襟帶遠樓觀畫圖雄物候  
逢秋異登攀與子同憶家滄海闊懷古霸圖空地暖初  
聞鴈江寒已落楓振雷隨急雨野日截殘虹歲月空流  
水飄零極轉蓬江湖歸未就徒此羨魚翁

九日登翠簾山

翠嶺出天中，岑巖到半空。  
歲時陶令節，登眺楚人風。  
葉盡聞虛籟，天清見斷鴻。  
別家滄海上，戀闕五雲東。  
暫就囊萸飲，誰論戲馬雄。  
醉鄉可栖息，渾不記飄蓬。

王屋山天壇

名嶽推王屋，孤標跨杳冥。  
深窺砥柱黑，高並太行青。  
分野連三晉，風雲萃百靈。  
鶴歸松已偃，龍去水猶腥。  
竈隱燒丹火，龕餘煉髓經。  
羽人金磬動，應此禮寒星。

三教堂蘭若

勝地傳三教空山少四隣溪流舊回合峯勢此嶙峋松  
桂風吟夜莓苔雨度春經殘蘿逕月燈掩石龕塵甍率  
疑天界維摩恐後身布金還長者攜酒屬詩人心遠雲  
堪卧門閒鳥自馴早祈蓮社就來此息貪嗔

同鄭逸人宿西山寺

翠壁開西麓金宮隱上方雲霞橫鳥道日月煥龍章桂  
殿丹青古松門草木蒼潭空窺鳥影夜靜識天香夢裏

觀生妄閒中歷劫長千山孤磬雨一逕落梅霜無復悲  
生事真如禮法王諦聞龍象喻初地入清涼

送李長史歸吳中

祖道大江流離筵起暮愁山川臨越徼詞賦動高秋興  
入張生鱸歸餘季子裘家林逢鴈到旅棹共星浮已說  
荒三徑常懷卧一丘朝簪辭白髮野趣入滄洲知己慚  
疎闊臨歧漫唱酬都將平昔意乘醉一登樓

劒閣秋陰圖



分野秦封盡山川蜀國雄塹江流地底劒閣起天中棧  
險崖頻轉蘿深月不通飛揚慙白帝開闢憶蠶叢氣候  
三秋異猿聲衆壑同棟雲常礙日巖樹遙呼風客路隨  
飛鳥鄉心掛落楓茲非曠達士應此泣途窮

逢牛尊師

道逢牛道士把酒醉雲房龍問壺中訣人傳肘後方久  
知鳧是舄更指石為羊遣興聊題翰無言但括囊秋星  
明劒氣夜月釀丹光酣飲從傾倒神遊極混茫別情波

渺渺歸路樹蒼蒼又擢扁舟去尋雲到草堂

冬日同林秀才遊行真觀

蓬島煙霞合琳宮日月開洞陰常積雪地古半藏苔竹  
已成龍去人因訪鶴來欲飛王令舄且醉葛洪盃菓熟  
經時換炊香待夢回晴光偏悅鳥臘色尚欺梅意靜寒  
泓水心同槁木灰鳳笙如可學吹月上瑤臺

重遊宿雲臺憶肅上人

昔日談經處今來獨上慵古臺黃葉積斜磴紫苔封片

月疑禪觀孤雲想化蹤  
夜燈無續火秋院有鳴蛩  
人倚題詩竹誰栽出世松  
夕陽無限思幾杵莫天鐘

同黃貢士登清冷臺翫月

山川收晚霽  
暝色上高臺  
共是吟秋客  
還同看月來  
衣冠林藪逸  
詞賦栢梁才  
山鬼驚聯句  
沙禽避洗盃  
河低全拂樹  
露重稍滋苔  
海上鮫人出  
雲中桂子開  
樂遊良夜劇  
高興昔人諧  
歸去金溪上  
看雲首重回

暮春遊林七欽園亭得朝字

星駕共招邀春園發興遙麥風將變候梅雨忽崇朝積  
石開蒼島重樓瞰赤霄池晴魚弄沫地暖藥舒苗啼鳥  
當窓近飛花逐砌消草深初雉雉槐細未藏蜩茗椀香  
雲滑牀琴白雪調野泉堪薦醴天籟訝聞韶被褐深懷  
玉裁詩擬報瑤醉鄉今已到何必躡洪喬

秋日同王校文登聖泉宮

玉洞煙霞古珠林輦路遙泉香懸菊瀑竹響度松飄疊  
嶂分蒼島危樓瞰紫霄芳樽攜就草清梵聽疑潮弔古

塵蹤杳觀空世慮消由來希習靜心境自寥寥

秋日同韓玄登宿雲臺

野客滄洲至乘閒上古臺江分平野斷樹盡遠天開散  
策尋芳草班荆坐石苔秋陰將日去鴈影帶寒來香積  
雕胡飯筵芳竹葉盃相逢成暫醉何必問蓬萊

竹林寺賦得園字

醫王多寶地長者給孤園入社逢僧夏尋山到水源樓  
開天海色逕掃石苔痕碧篠巢煙鳥青松裊露猿靜言

依覺苑永矣謝華軒此意無人會惟應達者論

登白鶴嶺

青山踰鶴嶺碧海望鯨川樹拂扶桑日巖栖若木煙土  
風驚異域星紀逼殘年草白寒威冽梅開暖律旋雪消  
泉動脉風急燒侵田病涉溪頻轉乘空棧若懸壯遊渾  
漫爾夙志豈徒然戀闕紅雲裏歸休白髮前長途今若  
折直道古如絃放逐應無愠懷哉柳下賢

宿雲臺燕集

海雨淨炎歊昏星換斗杓天開青杏靄帝返赤漂搖歷  
覽龍宮迴躋攀鳥道遙碧筒通露飲白雪度雲謠列岫  
疑看畫冷風訝奏簫竹深涼氣早苔密露痕饒祇樹栖  
馴鳥禪枝咽暝蜩園紅將下葉海白欲歸潮北闕休通  
籍東林喜見招棲遲心石古衰颯鬢蓬凋失路孤生感  
觀空萬慮消漫遊聊取醉何必躡洪喬

輓理上人

隻履歸何處懷師淚滿襟浮雲生滅性明月去來心閑

世真如夢安禪不廢吟留衣分法侶寫偈別朋簪雨蘚  
侵行跡風泉想梵音一燈寒竹暝雙樹落花深塔閉蟲  
粘戶巢空鶴避林歷峯山下路從此罷登臨

擬李謫仙秋日登揚州西靈塔

三天分絕頂一氣破層標夜月侵牛斗秋河界鵲橋潮  
聲雲海近闕影帝城遙滉漾珠光動淙濛瑞氣饒長風  
如可借九萬欲扶搖

春暮宿湖山蘭若



雨歇衆芳晚幽尋宿梵筵聞經方丈裏聽法比丘前  
逕投昏鳥荒山嘯夜猿天花飄嶂月玉磬度蘿煙殿古  
苔衣合湖光月鏡圓仰扳星斗近俯視地維偏心靜空  
塵到身閒與世遷三生應得悟來此問安禪

閩中十子詩卷四